

冬心先生集

冬心先生集卷第三

錢塘金 農 壽門

遊海會寺

青陽更始正春融拄杖來遊此寺中陰壑斷崖
泉出樹飛簷簷浮柱塔生風經殘未覩番書妙佛
古猶傳塑像工嬾學朝天奏韶護自憐蹤跡一
龕同

卷髮曲

有小序

卷髮曲悲彼姝中棄而爲房老也予寫
其紛亂之思託己之微意焉噫同情者

可以怨矣

舞釵股折粧鏡沒膏沐羞容衆芳歇黃支之犀
巧琢誰偏似天邊未圓月欲理翻愁同亂絲趙
家新髻儂不知一梳再梳已決絕那復纏絲是
舊時

遊竇氏別圃衛秀才惟順相邀過其草堂

閑話

駘蕩春遊戀物華已忘寄跡在天涯活禽生卉
看滕宅石礎松櫺過薛家巖隙尚須褰月幌酒
中只少泛星槎潛機幽蹟皆名理衛玠清言似

永嘉

題郭外人家種莎

滿徑移莎短鋏稀閉門春雨鬱生肥
勸君牽犢扶犁去好織青青襪襖衣

兔垆之陰有野花色如退紅每迎朝陽而
開惜未及日是則飄謝矣因成二首

暫沾朝露領朝陽鏡裏朱顏似窈娘
半日開花半日謝背人偷泣負風光

野叢浮艷自無名却恨新恩頃刻傾
若把紅枝較榮悴從今暮槿號長生

與謝山人夔池上弈二首

方罫楸枰布勢遲，鈎連小劫動偏師。
隔宵涼雨波如簾，想見銅池滉漾時。

臍膊聲中黑白機，茶香蠲渴昧心微。
西南風急舟幾覆，一角何人笑解圍。

感春口號

春光門外半驚過，杏靨桃緋可奈何。
莫怪撩衣嬾輕出，滿山荆棘較花多。

邯鄲花謝曲爲廬江應彤賦

月頭月尾花謝開，春雨春風客去來。
冶遊潛在

邯鄲陌酒卷白波一百杯而今賸有衫痕濺題
字柱心空照面可憐掃地軸簾人前閣後堂都
不見建安才子動猜嫌那復聞歌阿鵲鹽久虛
消息通魚鑰枉說清陰窺畫檐簌錢聲寂莎堦
黑隻影相思長悵憶隱語徒教休洗紅燕支山
逵無顏色勸君收淚莫偷啼手弄狂塵爲破迷
畢竟東南孔雀故巢好雙飛終解共雙棲

慕園題竹

便娟修竹覆欄楹出格幽姿天與成薄粉分沾
何駙馬清風合置薛先生湘中未掩含啼態淇

上空添掃翠情不見鷓鴣殊脈脈可知佳復負
虛名

重遊王屋訪唐開元時御愛松并韓抗爲
司馬鍊師書刻石不得小憩陽臺觀抵
暮出山

行尋御愛松偃蓋杳無迹憫茲百木長縛炬遭
幽厄又訪遺教碑批荅獎真籍韓康賣藥孫狂
書失鉤畫二者渺莫逢重來空念昔願遊不死
庭丹元嚙津液滅景走三尸潛光鍊九魄此閒
陽臺觀髣髴軒轅宅芝園納流霞蒲澗委玉鳥

我欲近掇之左神恐呵責學道苦云晚取誚古
逋客日落毛髮森出山悲天窄八極騁輪蹄難
追崦嵫迫

橫山舊廬獨吟

朱夏慕閉關煩瘃或消殄子子人跡稀離離花
光泣列岫窓靄蔽微鐘磬路緬松下百骸輕清
風勝和扁

松花

五粒三鍼想物初非花非霧伴潛居麻姑滄海
塵相似炎帝香蒲粉不如雲蓋結時朝絳節鶴

巢傾處點青裾果能服食身輕舉還熱陰脂勘
異書

孤蟬

已散青林樂孤蟬送夕颺露涼金鴈驛柳斷赤
闌橋枵腹無全飽枯形非一朝遺榮守清節不
共侍中貂

張二丈伊以白苧布見遺感作十韻

白苧一匹新出機銀光爛爛雪澄澄阿翁笑贈
意良厚却勝祁陽之輕絺周官書載厥名好疏
物更見風人詩其長四丈濶尺五纈密何減冰

蠶絲感君知我有野性裁成曲領寬袖衣罕逢
櫛櫛少苛禮梭輦桐帽方相宜今夏此邦多凋
瘵糾纏疫癘民苦飢旱魃搆虐土龜坼雌雷晝
鳴雨不飛胡爲卑處受毒熱鄉心早已歸江湄
準辦松毛縛棚香透屋涼颼穩卧黃琉璃

初秋養疾樊上

巖居養疾達郭壘侵木多于粥飯緣秋澗曲流
喧枕上槐花一寸積門前未忘舌本思今日尚
損腰圍似去年雲笈珠林從妙悟絕勝騶衍共
談天

槁山寺示諸僧衆

疊嶂鉤連擁磴斜。迦藍齋會設無遮。佛煙聚處
疑成塔。林雨吹來半雜花。年記鼠兒碑尚在。山
尋雞足路還賒。欲求文字資禪錄。須辦緇帷茗
一車。

寄贈于三郎中山居四首

身離束縛卸犀圍。白袷披時少是非。抖擻絕無
塵土雜。豈如十日澣朱衣。
彤闥瑣闥了前因。省直年光夢未真。試問仙曹
春雪裏。乳毛松格屬何人。

藥苗五葉當蔬畦穩卧家山丹竈西久別觚棱
朝謁早淮南不養汝南雞
而今隱作爛柯翁三百枯棊誰與同一詠覆圖
聞雨句秋鐙却憶鄭郎中

菖蒲

菖蒲光節俯潭清飲水仙人綠骨輕砌草林花
空識面肯從塵土論交情

北寺水廊聽雨有懷虞十八以潛

僧廊聽雨寫明珠塵垢齊蠲煩惱無忽憶綠蓑
青笠客池邊合眼即江湖

中秋夜翫月感作二首

當頭無翳欲梯空畢竟銀潢潛可通世上浮颿
與纖浪不教闌入玉輪中

蟾戶光明盼一年露盤濕桂又涼天須憐今夜
金波苦何處團團照粉田

東岡之下老屋三楹陳文貞公讀書處也
予嘗遊憩其間懷公有作

秋氣斂虛館東岡生道心林疎風脫翠山暗雨
添陰既有出煙磬復多聒渚禽六時喧寂意欲
繼謝公吟

海會寺池上觀魚呈道禪師四首

不戲田田蓮葉東
浮陽吞餌樂無窮
阿師撫掌留公案
大海何如沸鼎中

紫鱗勿損有懷珠
活潑天機相沫濡
未必歲收千百利
堂堂策策少驚呼

憑檻風來聚藻涼
可知聞法喻空王
掀波逐隊爭迎我
錯認臨江白石郎

八功德水溯靈蹤
清淨雲山覲面逢
恍在放生池上坐

拋殘香飯聽湖鐘

吾郡西湖上有放生池往年嘗遊其間觀

僧施食

東岡望砥柱山

砥柱峯高儼帝囷每千檐隙挹鮮新酒場莫負
今朝約風掃疎林雨洗塵

白鷗詞

有小序

蕭穎士之言曰白鷗羽族之幽奇也神
貌閑暇不雜于衆鳥人莫得而馴狎之
若紕乎籠樊之中殊可嘅已茲覩其羣
摠拘囚之狀似類予者因成短歌珍禽
有知能弗引吭悲鳴一和予耶

白壁一雙買白鷗主人三載愛漸慳朝來不飲

亦不啄何日開籠返故山素襟難易原太潔身
若穹廬古時雪安得見爾生逢南越王西京貢
入趨步隨鸞鳳凰

上黨道中二首

霜驛平分朔鴈程天連上黨識雄名他年若掌
周官樂好驗山中牛鐸聲

熨斗臺荒漳水寒壺關西隔路迷漫遠峯挽髻
雲堆絮偏在匆匆馬首看

聞喜縣中早發行四十里宋秀才士諤乃
出豐饌相邀午食因紀長歌并以述連

日勞役之不同也

驛鼓統統打五更羊胛已熟東方明落葉滿頭
人曉行馬蹄鬆快沙路平轉憐前日歷奇險左
縈右旋皆山程午攀峯脊穿嶺腹恍如百級登
枕搖懸旌其上石門東關鑰窮陰出鬼含怒瘁
人馬困憊欲齧咋解鞍投枕舒煩情今朝坦屣
筋力健况復曦景鮮雲生當年韓趙空戰鬪時
清安有烽煙驚絳水涑水渺何許徒令懷古吁
交并邑中才藝數裴秀後來領袖多儒名襄陵
之酒果易醉西郊汎醪勞相迎脯腊腴腴非不

飽未免秋風刮面思蓴羹

詣庶滋上人齋堂蔬飯望中條山

淨名已悟小輪圍紺宇精嚴一欵扉孤竹瘦於
尊者相野雲白似道人衣何曾心地妨禽鳥且
向齋堂飽蕨薇試上莓梯腰脚健中條山色見
纖微

入王官谷

栖逸王官谷清暉日夕娛一池寒藻合三詔舊
堂無荒壟除山稅東菑足晚鋪土風稱習儉仍
不改唐虞

蒲州劉高士仲益隱居不仕時時斷炊作

詩慰之二首

林藪惟知味道腴長貧何用計華枯解嘲却笑
丹陽尹一斛檳榔消食無

我亦枵然人外閑飢腸時復破天慳采薇歌罷
鉤簾坐飽看君家雷首山

書乾牒子郭汾陽事

旌旄開府攝兵戎永鎮蒲州郭令公自古功名
堪一笑元來河瀆親家翁

渡黃河二首

沉璧曾聞致太平
龍門竹箭疾流驚
星源自解通銀漢
豈待千年後始清

喧逐怒觸起盤渦
曲憶筵篴怯渡河
從此登車問騶卒
夢時可有惡風波

前年邂逅郭十一
詹吉于滄州
昨歲又遇于沁縣
今秋予過登封
意外把臂感而有作

康莊迷軌失亨衢
潦倒秋風獨向隅
萬竅不休悲宋玉
一毛無濟泣楊朱
日斜黃葉先朝寺
山映青旗賣酒壚
話到前期更憐汝
三年三處客

音殊

舊有寫經研自爲銘曰白乳一泓忍草一
莖細寫貝葉經水墨雲山粥飯僧屬廣
陵高翔以八分書之汪士慎鐫其背往
歲攜遊京師僦居慈仁寺六月多雨青
苔及榻客厨時時斷炊竟易米于貴人
矣今偶登嵩山過片石菴閱釋氏之書
休憩樹下忽念故物率成二詩詩中雜
述所感不專言研也

紫衣三載已飄零筆墨無緣再乞靈今日齋堂

空一飽思惟樹下悵繙經

手閑却嬾注蟲魚且就嵩高十笏居到處雲山到處佛淨名小品倩誰書

過玉晨道觀潭上

潭上淨難唾坐見新泉豁竄竹不爲喧瀟雲始覺活代黑影幻所思狂名戒相掇如在洞霄宮尋源一杖撥

中條山下人家

蒼翠中條路人家荒史前逃名却蒲帛無象喻第筌廣場勤春稼長廊畫古賢好將山下水一

灌凍陰田

坐洗藥泉上出匣中雷氏琴手絃而口歌

之

琴古之子遺黝面心匪爛今出幽匣中零落殆
已半所幸五音全和平不我叛客居若架巢女
蘿以爲幔一曲楚明光緩爪自澡盥彈無剿絃
憤聽有捐斤歎松吹遏流雲溪籟激清旦謝彼
撼鈴人毋來女妓聲亂

寄盧郡掾叡

之官已三月高卧狎青冥牀上列茶脯花間鑱

印廳無言慕刁琰大道問瞿硎聞說謝曹掾行
尋千歲苓

過茹桑仁者方丈禪話

方袍林下緇相見折松枝古水自荒裔連峯轉
委蛇龕深寂無垢雲白淨如篩後佛衆前佛清
涼生四肢

題湘陰女郎畫竹三首

粧閣流風洗黛痕管夫人法卷中存生來不畫
紅花樹怕見倡桃笑倚門

竹枝新長楚江頭便有煙昏細雨愁若說無心

心最苦斑斑湘女暮啼秋
物外嬋娟用意深此君寫照在虛襟
散傳南國知增價豈止吳兒一鎰金

僦居玉溪與無悶講師精藍相近屢過率

贈

聽法何心發愛涎溪光汨汨石菱菱一牛鳴地
時相見雙樹影堂還結緣消受佛香方外客潛
通茶夢定中天南宗釋老門風在拔苦元來出
四禪

廬郡掾官齋銷夏即事有贈四首

笑釋形拘坐綠槐黃梁未熟睡先催問君轉乞
邯鄲枕入夢無須出夢來

濟源水味恨難同茶事殷勤羨乃公野竹也知
能請客暑風都變作清風

冷金牋上五言多才子偏教鬢已皤花塢夕陽
吟更好而今大曆勝元和

退耕決計話抽簪九品官資七不堪攜手山妻

鹿門隱草堂何必在終南

君自秦徙居楚中近二紀矣

秋雨坐槐樹下書懷

昨宵娟魄明銀蟾似水澈澈棲短檐雲翳那礙

半影好露洗轉覺清光添低頭思鄉了無益三
更著枕垂風簾今朝袷衣換敝笥滿城秋雨飛
霏靈靈陰晴之理意難度豈能乙巳窮窺占階前
老槐十圍大碧羅張繖高厭厭花開未落葉忽
落可憐樹亦生涼炎嗟予朱顏就沮喪口鮮滋
味非醯鹽方枘圓鑿匪所用顧者却避多猜嫌
客嘲賓戲深且險伯居反貪盜跖廉江東士氣
乃不振堅守中壘提封嚴何如傭書鐵佛寺寫
經一卷直一縑

懷甬東邢十九大纘秋試二首

高槐纂纂報花期
花愛秋黃弄雨絲
遙憶西陵渡江客
擔書可有餽船資

白頭未嫁守家機
周召餘風好發揮
料爾今番領鄉薦
三杯仙露換麻衣

懷張機客淮陰黃樹穀客廣陵

清淮淼淼接雷塘
二子淹留各異鄉
心跡無聊如賀老
風流不墜在江郎
對花鏤管知爭巧
乞食吹簫也覺狂
念否春華戀分袂
啣杯相與坐藜牀

寄盛上舍綸三首

江墅通僧窟談禪卯色天瘦權與癩可謂乎中聖眼兩

師小同坐筇箕泉

里中詞客惟汝苦調潘郎鬢絲今日阿儂憔悴秋霜也到吟髭

紫琳割得自端州相贈煙先浩不收笑比水田

三百頃代耕何用漏蹄牛

春閒予曾以手製田研奉貽

茶事八韻

雲根一蹄泉白乳好顏色汲來日煮茶準之自有則離火斥穢薪溫谷用無息候湯毋妄沸司命在盡職鍤古交牀支甌香淨巾拭櫬設品不

同甘苦味全齏何如小峴春獨飲通仙默蓬蓬
肺渴塵驅去若五賊

八月十五日夜對月寄內二首

一夜光華濯魄新明明穴鼻認來真月中田地
知多少不見花開散麝塵

刀鏤有夢逼秋期料得家人歌屢屢江上歸船
杳無信可憐虛嫁弄潮兒

攜酒送客

毳幕韋韞客去初客中送客折轅車晚峯千髻
煙相妬清酒一罍玉不如冷飲果然添耳熱愁

看從此與天疎馬頭生角烏頭白塞上悲歌磨
盾書

旅夜聞箏贈別孔氏兄弟三首

彈箏峽裏響淙淙豈是秦聲按瑣牕紫鴈斜飛
絳河近不教零落一雙雙

開元妙藝幾人知曾拜瓊瓊作女師細數哀絃
剛十四此生長恨月圓時

夜闌手語動離心我亦聞之淒怨深難免西風
傷老大恍疑孤艇泊楓林

題賣餅家壁

葱肆漿房半故儒
康衢賣餅亦潛夫
淒淒燮燮
油鐙裏讀罷公羊一卷無

雨夜寄廣陵諸子

一鐙如菽雨
縣縣揚子橋頭阻
達天葉落晚潮
思楚樹酒添涼
席夢吳船王曇何減聞歌日
陸展尤憐染髮年
通夜蕭騷不成寐
惺惺獨鶴感
嬌眠

送周郎赴劍州

曲換明珠天下無
岷沱西去寸心孤
若逢蜀道蕭蕭雨
一弔伶人張野狐

懷鮑十四涿州

酈亭流寓注書成自有清資日下名一束腰犀
須早辦范雲來歲即公卿

送猗氏杜祺孫之雍州

劍鐔扣罷又重看飯顆山前骨相寒天上雙鸞
求未得河東五牴畜何難且同吟杜親書檠莫
以離杯負菊欄此別霜華快如洗到時落葉滿
長安

觀獵二首

飛鞚疾于鷲射生惡少年風毛與雨血何苦污

青天

萬事落人後馬箠空有銘不若揖黥卒尚知太

白經

戊申九秋予在太行道中作馬箠銘銘曰滑溪之籐可策而走籐雲籐雲母落人後

嘉定楊謙

以水墨畫梅見寄不減清厓長

者家風客牕展看如掇冷香漫題二首

一枝梅好墨淋漓寄自逃禪老畫師所恨未曾

親見得鉤完花瓣點椒時

莫認緇塵浣素衣畧同清瘦是耶非水邊林下

從頭想如此江南不早歸

冬雪

稷稷冬雪深即之在林表噫氣失煖威頑寒出
陰矯正如客心苦墮落無復躋相警保堅白勿
使不潔擾

著敝裘寄丁處士江上

羊裘雖敝戀此翁歲久毛禿非茸莢貧憐老鄣
勿可棄故物却與故人同是鄉九月已飛雪衆
草淒枯百蟲閉披時未抵酒力融身弗煖今心
轉熱朱門值得一錢無較之冬綬回寒噓手韞
欲覓不龜藥江頭并辟今何如

送西吳詩僧超嬰南歸

詩僧新得靈運孫行山集好十卷存苦吟五字
振禪藻家風羨汝真至臻臘月行勝趣清旦歸
去還應弄柔翰冰雪之交花正開佛案寒香吹
不散

木瓜山下賣花翁見送木瓜報之小詩

不數宣城簇露枝額黃顏色映書帷園官送到
香如澁正是客心酸楚時

雪中懷汪十六潭客居梁溪并寄王先輩

澍

昔時綠池上聽雪捉鯁船此日黃茆外離家負

秋田幾生續流詠何物駐凋年因念夫椒客充
寒有半氈

懷陳學士午亭山居

思母菴長鍵相違歲月但高松戀雲壑飛翠濕
山厨詩擬剡中好泉聽樊口無不須綠玉杖醉
倒兩兒扶

墮車戲作

衝泥郭外聽鱗鱗難覓當壚飲火春失笑連宵
夢芻狗餓夫翻作墮車人

己酉除夕

客歲更難挽堂堂去寂然自添商陸火誰送水
衡錢疊鼓聲何逼孤杯味可憐梓中消夜果風
物憶南天

冬心先生集卷第三

雞正癸五十四開
離于廣陵殷苛廟

冬心先生集卷第四

錢塘金 農 壽門

元日過張少府小飲花下

仙尉逢梅福同爲上日吟鼻香開酒庫眼亂入
花林資物春溫早迎人善氣深西山掃殘雪蠟
屐試登臨

沽酒

沽酒旗亭雪後稀玉缸辜負典春衣新年客味
渾依舊無怪空瓶耗耗歸

人日寄小姪二首

鼎鼎飛光催客頻元辰纔過又靈辰池冰忽泮
花銷雪果信春風是恨人
千里歸情攪晏眠何時接手玉華前阿咸定爾
憐頭白嬾逐銀幡鬪少年

憶茶

草鋪綠芻地無塵朝日熹微榆火新兩串春團
三道印不知茶宴赴何人

水北蘭若與孔毓銘對某即送歸里二首
僧寮一局子丁丁本欲忘機機反生筭盡苦心
聞見絕松無交影水無聲

合離聚散各如何君說還鄉卧礪阿來日休某
向岐路路中岐路較某多

過善師禪林蔬飯

病起維摩招客來鉢囊初解小徘徊澗鐘山磬
經時聽意樹心花頃刻開昔夢詎忘青豆舍妙
香尚驗白檀灰從茲斷飲吾何有多事春風勸
舉杯

訪韋隱君用良山居

先生履屨笑雙穿不礙幽尋精舍前樵斧無聲
雉登木巖花弄色雨添泉兩朝耆碩遺風邈百

氏菁華副墨傳從此槃游申古訓往來人擬洛
中賢

東郊客舍寄章十五舍人

風襟不整減心情一任牀塵滿把生但覺交遊
無鮑佐幾曾才藝識蕭卿春浮暖陌芳垞遠花
坼山櫻野館明只合杜門稱嬾放注書且喜腦
華清

過長林寺

青山傳捨宅一宿去來緣樹下問僧臘龕中送
佛錢連陞迷壤磴細縷出新泉露地牛何在千

畦欲募田

上巳日楔飲風漪園有懷顧十二韋之客
洛陽

三月重三節紅敷正好春浮杯曲池映濯髮楔
堂新絕少衣分麝無煩扇障塵馳情想溱洧亦
有未歸人

蔡七舍人端富于藏書皆手自精校曩歲
曾一訪之今渡京江削牘寄予因答來
貺

昔訪灤東宅百千萬卷書今來京口信三十六

鱗魚丹墨授無恙寒暄慎獨居臨風答嘉藻何
日誦瓊琚

雀啄覆粟曲

牛折角車淪泥雀爭殘粟天色黧喈喈嘖嘖聲
惻悽勸汝且食戒勿語無如飽腹將雛栖昔人
辨聽反爲累吁嗟從來口舌真禍梯

遣悶二首

黃羊祀竈却無因故智昏昏喪所真天帝聘錢
何處貸萬緡不及鄭商人

團團朝日出東隅多少驅車九達衢莫晒長貧

河上客緯蕭自可得明珠

有憶二首

茫茫誰憐燕尾長
芹泥冷落已銷香
換巢一去非無意
不愛雕梁愛草堂

紅啼薇帳吐愁煙
曲榭翻爲杞國天
回想昨年花好些
尚容酒病老夫顛

紅檐

隔夜擣蒲星陣橫
四絃愁是子絃聲
合昏花下澌澌雨
不放紅檐一刻晴

闕里逢華陽蔣三丈衡

昔君訪我蒲帆八幅飽挂東吳船鐵幢浦口立
談斜照目注寒林煙是時各具豪氣詎屑事屠
僧君誇強仕頭顱未白我懷鉛槧矜少年忽忽
別去不相見者踰廿載塞鴻江鯉何處問訊同
周旋知君遠走秦關三輔地鉤弋宮廢徒弔渭
水昆明天比歲我亦惘惘出戶減懽味閩粵荆
湘燕趙而達伊祁故都悲顛連黃河怒洩也曾
窮源到碣石中條山色總在老夫七尺烏藤前
今春鄉思頓起俶裝返越國車謙馬瘖難覓脂
秣殊可憐道過闕里展謁孔廟觀禮器正屆

皇帝重光櫬楠新豆籩輓轡街南交公陋巷忽
與君聚首顏家兄弟簞瓢取樂誠好賢初驚鬢
髮已變霜雪有衰態坐定轉訴羽毛凋脫泥土
忘飛翺君言抱經載橐來此聖人之邦償夙志
願寫淨本一一列入兩廡青瑤鐫我聆斯語獵
襟增歎息蔡邕往矣三體茫昧靡完全魏邨鄆
淳蹟就殘毀所留大曆開成諸儒楷法黌門懸
又言世尹愛客不遺舊闢櫺加堊爲君分餘田
軒窓開拓得以正心執管摹點畫六十五萬二
百五十二字母頗偏惜我淺落鮮用將乘秋風

放歸溜胡能快覩羣書功畢奏寘魯壁累襪爭
流傳吁嗟華陽真逸方瞳湛碧自長壽他日隨
君金堂璫館攝景尋神仙

題貯清館

策竹到竹裏竹風導我行連縣石多態淺瀟魚
至清忽見九節蒲不共衆草生問之了無荅仙
貌誰削成

不睡枕上口號二首

攪舍鼾聲久破除不眠夜夜似鰓魚若須閉目
垂簾坐此是仙人我弗如

居然枯腊稱尪羸煮藥空堂試一匙八萬四千
毛孔裏汗來微有睡來時

病起扶杖循廊小步二首

曾鬪蘭陵八百兒爭先捷步尚嫌遲而今花底
紅藤杖扶得晴廊立片時
蹣跚平地亦難前跂脚虛教摩涌泉不信去年
尋虎窟太行容易上青天

問顏大懋倫疾

榻掩青苔徑沒莎巷中深轍幾人過海枯石爛
愁仍在鳳躁龍狂病轉多齊物彭殤原可擬同

年椿菌又如何憐君秋雨秋風裏擁被寒廳亦
抱病

秋雨

秋雨如塵多積病抱幽耿晝分木客吟夜同鴈
奴警池面風溘溘簷端樹回回何以曲肱牀偃
卧弔孤影

短睡十韻

睡鄉蚩蚩人樂哉此中訝我久弗來得毋以夜
爲日在酒國蠟煙如熏花成埃騰觚飛爵忘漏
促沉湎何啻是鴆媒嬌絲脆竹志易惑溺之官

微皆生災不然天桃百媚楚女顚翠蛾一一畫
麝煤長袖善舞更擅曲行雲行雨迷陽臺我聞
若輩苛責語口勿能辯酸心摧吁嗟作客抱寂
寞三旬負病形池隕豈但寡歡屏聲色即今斷
飲焚尊壘斯須拱揖遽別去依舊獨眠魚目開

懷戚五丈東發江上

黑齒曾遊古陋邦歸來散髮卧清江纂書可載
車兼兩負郭難謀田十雙堂下野花迷舊席門
前枯柳繫輕艘遙知待我餘杭酒醉弄霜天鐵
笛腔

西林秋夜聽支十丈彈琴

秋夜白頭客抱琴彈此聲離棠花漠漠古樹水
丁丁絃直寸心合曲微六氣清斷雲與孤鴈都
是欲歸情

題何山人琦活埋庵十韻

客舍如團焦林木紛幽覃急喉何居士投老樂
湛湛一日百憂生戚戚獨繭蠶而非酒可解具
鍾心失貪抱頭嬾卧起署名活埋庵我覩慄弗
懾問荅皆悲談讀書不得力辛苦慚丁男滋味
槩與茶安能變成甘勸子且遊世單步行荷擔

出門山滿目好山在終南

新絃曲

故琴今夕張新絃彈者生澁聲可憐一絃斷今
一絃續心有別離手則然枯桐本非縣下棄收
之古囊且自悶宮徵何嘗音不諳試向歲寒尋
此意

貧交送別曲答諸酒人并呈蔣三丈

貴交之別祖帳長纓驂紺幃大道傍腊夫炙豕
還刲羊昔聞相送吏部郎貧交之別則不爾濁
醪一杯話千里落落酒徒尚如此白頭故人可

知矣

秋柳和陳三撰二首

蓬鬆綠鬢減腰圍可奈風欺霜倒飛已失三眠
舊時態絕如房老泣孤幃
何愁婀娜一枝殘金縷衣銷舞袖寒轉眼明年
春二月龍池曉雨拂蘭干

近事

曦光烘紙坐堂廉書字無緣換束縑可笑客塵
生鏡撲花前嬾去摘風髯

六言寄題洪三上舍公裏江湖載酒遊卷

閉關貪飲十榼東帶笑迎五經何似江湖一舸
綠波顏色滿瓶此中可夢南浦而外宜遊洞庭
小泊互爲主客野鷗飛下涼汀

馬曰琯曰璐兄弟招同王岐余元甲汪墳厲

鶚閔華汪沆陳臯集小玲瓏山館

少游兄弟性相仍石屋宜招世外朋萬翠竹深
非俗籟一圭山遠見孤棧酒闌遽作將歸鴈月
好爭如無盡燈尚與梅花有良約香黏瑤席嚼
春冰

宣城沈丈廷瑞畫松歌

我家萬松嶺下松已無煙煤掃跡天水愁模糊
却于宣城老子畫中見綠髯紺髮拱揖如丈夫
昔聞張璪負外最奇古手握雙管齊運與衆殊
紙上一爲生枝一枯枿落落之狀未肯容臃臃
今君遠追遺法自森列硬筆有同割飛鬼國鐵
何假鳬氏大火來燬成直榦彊立焉能遭錯折
要我作詩贈我長幅好攜歸挂壁終日坐歎絕
癢琴悶雨髣髴是爾聲此聲荒涼可聽不可說

過唐太守紹祖吳興郡舍信宿三日瀕別

漫投十韻

春風碧瀾堂扁舟晚來泊汀草雜汀花野香各
無著靱履入郡齋相見話歲籥輾然笑口開情
好宛如昨即知廉守賢民事自疏瀹信宿三日
留殷勤一杯酌朋輩得蕭李文翰乃紛作夜聞
雨淋浪其心在寥廓明將泛江湖馴鷺先我諾
去去綠蓑衣漁竿計非錯

廣陵北郭花下獨酌

獨攜小榼少人同林木參覃地百弓我與飛花
都解飲好風相送酒杯中

寄閔八

貧而好客鄭卿賢小別相思若閨年簡雨疎風
草堂閉定知一夕長苔錢

吳丈弘謨攜酒過寓園竹閒對酌長句奉

酬

三春虛擲花事拋今甫重幕燕定巢既無熱人
共爭席却鮮弟子私相嘲結朋惟愛老蒼好晚
乃與君深締交越日載酒過別圃竹下一壺傾
松膠此閒種竹可五畝勿遭惡棘纏荒郊繁陰
當年生冷翠弗揉自直異曲匏滿林得風作笑
語綠膚新粉抽煙梢夙聞妙手擅鉤勒蕭協律

派非誇嘍欲乞放筆寫萬个目接厓谷心垌郊
君言秋涼再連話爲我潑墨畫出金錯刀

五月二日吳孝廉瀚上舍濂招飲遍嘗所
藏名醞聽吳下李周二生擷笛度曲醉
成此詩

綠蒲節近晚酒香先開酒庫招客忙酒名記注
細可數觥船潑灩同品嘗中有汜光春更好新
鷺出浴燭膩黃飲如建瓴不放手三萬六千少
年場君家弟兄工譜曲減字偷聲皆樂錄傳抄
今已遍江南肯使酒徒冷空局周郎小李產吳

趨鷓鴣灘頭一雙玉忽來筵上勸我醉激管清
喉夜忘促調變伊涼入破多後庭還唱定風波
眼花迷纈心苗損恍聽狗兒吹笛膽娘歌

題汪六處士士慎蘭竹二首

雨過深林筆研涼女蘭開處却無郎柔荑駢穗
多纖態不數金陵馬四娘

道人絕粒面蒼髯寫竹偏來南垞西清瘦兩竿
如削玉首陽山下見夷齊

寄題李徵君秉元青櫺別業

割地棲巖道味深一舜州辟見初心小經曾習

嚴彭祖至孝無慚何展禽雲卷有時來枕席麝
遊自古在山林餘糧我辦支筇去十八盤中曲
磴尋

褚先生恒謙老毀儒服委跡浮屠聞其瓶
拂隱于鄆縣山中寄贈

渴來安得萬年冰却羨清涼住九層晚謝朱轡
烏府客老爲白閣紫衣僧長眉掃埽花間久左
手鈔書鐙下能歷盡劫灰人隔世颺輪輾破法
輪升

憶家

爛銀月色露檐垂千里思家鴈信遲正是擣衣
衣半濕夜燒熨斗坐空帷

將遊楚中於眞州江上登舟二首

眞州判袂客途新悄悄迢迢最黯神上得孤舟
聞疊鼓橫波送酒却無人

亂柳摧心野郭秋隔江山翠晚奩收月初缺處
津頭別髮髯湘煙楚竹愁

寄岳州黃處士端齡

一繩天外鴈來初露脚涼飛月魄虛沆芷澧蘭
騷客達朱橋粉郭酒人疎須憐夜杓難同飲莫

悵風帆少定居愛爾洞庭吹笛賦昔年傾倒老
尚書

過小孤山

古縣蕭條對岸開大江行色榜人催水風多處
輕擡眼浮出青山似覆杯

郢中放舟至襄陽

船頭望青山衆態逞嬌嬾飢煙明浦樹飽風送
帆席繼作郢中吟緬懷峴首客際晚計郵程百
五宿江驛

寒夜過荆山人山居

雪中寒色到肩隅黃葉堆門月暈無想見苦吟
風燭下靈龜屏息玉蟾枯

西池精舍梅花二首

半影疎枝夢不忘獨來樹下設禪牀酒鐙歌板
都無用莫亂梅花好道場
月光明似佛堂鐙池水生寒又結冰消受清香
透毛骨除非前世此山僧

復至武昌將還錢塘留別許士諤二首

一掌好風吹煖煙乞來不費沈郎錢連朝絕似
嘉陵路水送山迎天上船

官道垂楊客轂系留堆棉搓絮武昌樓此番傷別
無須酒坐有仙人許散愁

秋夜鮑明府鈐攜酒就劉郎泊小酌與姚
世鍾同過

秋夜秋池幽且娟涼鷗涼鷺五湖水明于月
宜同夢樹老如人又十年散髮賀循言可聽啣
杯謝瀟跡堪憐劉郎泊記思前度好續吳興掌
故傳

玉湖阻風唐太守招飲浴月歸宿舟中作
此遣興

石尤風甚厲故人酒頗佳阻風兼中酒百憂釋
客懷先生了公事文案無繁哇簞竹閑鈴閣乳
雀馴苔階組圭澹相忘林壑期不乖既恕向相
狂且作錙伶埋歸來見涼月其光新磨揩空船
啣尾卧濁浪如長淮

歲暮復寓吳興姚大世鉦蓮花莊之寒鑑
樓雜書五首

家家三尺好溪光此處溪光墨瀋香樓上南山
如女色曉奩開候翠眉長

宿葦枯蘆有鴈聲連宵倚檻詎忘情還須把酒

吹寒笛十二回圓坐月明

題壁蛛絲親拂除諸郎昔共此深居蘭熏玉纈

嗟摧折不見對牀人讀書

謂二友秉衡
豐萬兄弟

鷗波亭外水濛濛記得今秋攜釣筒消受白蓮
花世界風來四面卧當中

雪尚未晴雨復喧六時思與阿誰言纜船絕少
金欄客漁弟漁兄笑叩門

吳中春雨泊舟入夜寒甚被酒作歌

春雨打篷雲冥冥篷底聽雨泊遠汀十五五
長短亭好山對面失洞庭野梅縛棘香零丁疎

香激玉飛瓏玲苦寒噤瘁夜不寧水際一鐙如
孤螢照書冷燄光星星傾三百杯影勸形滋味
濁清辨渭涇醉來荒唐嗤楚醒伴我卧者空酒
瓶

自曲阿之潤州渡江作三首

小辛邨圯曲街通孟佐湖荒遠岫空好試斜風
細雨裏紅闌射鴨竹枝弓

碧草抽心花脫胎舊情長觸客腸迴去年今日
離筵上楚女春衫拭酒杯

迎船塔影渡江遲愛誦瓜郎五字詩對面相思

若千里石簾山下落潮時

懷張先輩幼持林居

十年焚執卧林枋深閉書堂少俗矜收得此心
如鎮石常時見面有寒冰空囊趙壹清無匹一
揖奚康嬾未能曾共春風三度醉櫻桃花下曳
青藤

柳三首

銷魂橋外綠匆匆樹亦銷魂客送空萬縷千絲
生便好剪刀誰說勝春風

酒邊青幔水邊樓郎馬蹄忙可暫留三月長條

如翠帚掃愁不得反添愁

偏汝無端替別離離多合少費相思獨眠人夢
模糊甚正是飛花作雪時

廣陵秋日雜作三首寄一二友舊

精廬淨于水雙樹縹綠初石琴託心謠竹扇擅
草書騶從時罕逢隼旗來已虛惟有秋鐙下麴
生不我疎

明年當爲僧漸欲匿名姓負薪叔敖飢苦雨子
桑病未能希十賚安可膺五聘抗顏誓還山還
山慰幽賈

何兄與樊弟巖館忘世情茶夢澹而媚藥塵香
且清屢訪花隱翁踵息無一聲好比江上鷗戢
影戀舊盟

送宣城沈隱君遊楚中

君訪漢陰好機心機事無山寒道士秋月古郎
官湖活筆添松格清謠想鶴癯明春定歸卧崦
戶足茶租

城南僧舍寄梁高士文翰二首

乾淨逍遙地經年白杜情晚雲看千變清磬槌
一聲杞菊澹相向龜魚時放生此中悟蕭寂禪

悅最聰明

高卧午纔起浮華已嬾攀秋林廣陵郭鄉夢富
春山帖帖風襟短栖栖蓬首閑故人書遠寄好
附酒船還

新編拙詩四卷手自鈔錄付女兒收藏雜
題五首

聖代空嗟骨相癯常裁別體關榛蕪他年詩話
添公案不在張爲主客圖

鐘聲斷處攢眉想日影趁時擁鼻吟隻字也須
辛苦得恒河沙裏覓鉤金

古調泠泠造眇微玉池清水自生肥流傳若待
官三品誰重襄陽是布衣

天涯詩老浪相稱棖觸清愁歲月增一櫂今成
五湖長酒波如練雨如澗

卷帙編完頂髮疎中郎有女好收儲帽箱剥落
經籬敝莫損嚴家餓隸書

冬心先生集卷第四

雞正癸丑十月開
雕于廣陵殷詩齋

吳郡鄧弘文仿宋本字畫錄寫